

## Famia i Balornan

Un famia ta un komunidad chikitu. Kiko esaki kier men? Den un famia e miembronan ta kompartí hopi kos huntu, manera amor i tristesa. Tur ta yuda otro ku trabou di kas i kuido di esnan debil,



manera e chikitunan, e grandinan i tambe esnan malu. Den e komunidad chikitu aki tur hende ta eksperensia e amor grandi ku Dios mes tin pa kada un di nos.

E amor ku nos ta kompartí na kas ta yuda nos den e komunidad pafó di kas, manera skol, trabou, deporte, aktividatnan sosial. E balornan manera amor, respèt, obediensia, humildat, toleransia, kompreshon ta loke e mayornan ta pasa pa nan yunan for di chikitu. Ku e balornan aki òf bon kustumber tur por yuda forma un komunidad mas grandi unda tin hustisia i solidaridat. Balornan kultural, étiko, sosial, spiritual i religioso ta esensial pa kada miembro di un sosiedat.

For di e balornan ta sali e normanan, esta e reglanan ku kada unu mester kumpli kuné den su komunidad, su famia. Den un famia unda ta reina respèt pa otro, anto no ta difísil pa eksigí di e miembronan pa nan ta yega kas na ora, kompartí trabou di kas, regla tokante bistimentu etc. E norma i balornan den un famia mester ta bon kla, pasobra e komunidad pafó di kas tin hopi influensia riba komportashon di hende. Por ehèmpel medionan di komunikashon, uzo di internet, amigunan, skol etc por afektá e balornan ku nos a kultivá na kas. Si den e famia no tin amor i respèt pa otro, anto e miembronan lo no por pretendé di ta stima Dios ku nan no ta mira. Ta den e amor ku nos ta manifestá pa nos próhimo sea na kas, na skol, na trabou, den deporte etc. nos ta eksperensia e amor di Dios; Esun ku a krea mundu i tur su sernan bibu.

### Diferente sorto di famia

Nos ta konsiente ku diferente faktor por kondusí ku no ta tur famia ta konsistí di un mama, tata i yu(nan). Pa motibu di divorsio, mama òf tata soltero nos konosé

otro tipo di famia. Pero e adultonan tin e mesun tarea pa eduká nan yunan ku amor, kompreshon, respèt pa nan por ta hóbennan ku ta pasa esakinan over pa nan amigunan. Muchanan ku lanta sin kariño di nan mayornan, por trese problema pa e komunidad manera kriminalidat, drogadikshon, embaraso hubenil, violensia, drop out na skol, oumento di malesanan venérikò, aborto i hopi mas. E problemanan aki tin un impakto ariba nos sistema hudisial, salu públiko, asuntunan sosial, merkado laboral den forma di plaka. Pero mas ku tur kos e felisidat i stabilitat di e famia no tei i konsekuentemente e komunidad den su totalidat tampoko no konosé trankilidat i un desaroyo sosial sostenibel.

Hóbennan ku ta lanta sin amor i respèt pa otro na kas ta bira individuonan ku ta faya na skol i den komunidad nan ta komportá nan mes sin respèt pa adulto i nan amigunan. Adultonan ta pensa hopi biaha ku nan por kumpra e felisidat di e muchanan ku material; paña i sapatu karu, 'Smart Phone', 'I-Pad', 'Tablet' etc. Den un famia e amor ta hopi mas importante ku plaka.

### Famia: e promé skol di FE



Nos kada un tin e tarea pa eduká nos yunan segun e ehèmpel di e Sagrado Famia di Nazaret. Si den un famia tin amor, kariño, respèt pa otro anto e hóbennan

ta lanta tambe ku un amor pa Dios i e ta siña kompartí ku otro. E por transmití su amor pa amigunan, adultonan i esnan mas grandi den un komunidad. Den e mundu aktual influensia pa materialismo, mas i mas e mayornan tin e tarea pa duna nan yunan un edukashon religioso basa ariba norma i balornan segun e siñansa di Hesus. Di otro banda e pais den su totalidat, komo tambe gobièrnu i otro instansianan mester yuda salbuardiá e balornan humano, esta garantisá e identidat di e bida familiar. Esaki entre otro pa medio di proyektonan sosial bou guia di profeshonalnan pa yuda e famianan riba tur nivel di komunikashon, edukashon, spiritualidat, finansia, seksualidat etc. Asina nos por evitá ku nos famianan ta parti for di otro i ku tur konsekuensia ku esaki por trese kuné pa nos hóbennan, esnan ku tin ku guia nos pais den futuro.

